


## Ubica iz El Pasa objavio manifest pun mržnje i rasizma



Napadač osumnjičen za ubistvo najmanje 20 ljudi u El Pasu na internetu je prije smrtonosnog pohoda objavio manifest za koji teksaska policija i tamošnji politički čelnici tvrde da je ispunjen mržnjom i rasizmom.



Mediji su identificirali 21-godišnjeg Patricka Crusiusa, iz grada Allena u Teksasu, kao napadača koji je počinio masovnu pucnjavu u subotu u Walmartu u gradu El Pasu na granici s Meksikom.

Iako vlasti nisu službeno potvrdile njegov identitet niti su detaljno opisale sadržaj njegovog manifesta, dokument objavljen na internetskoj stranici '8chan' nekoliko sati prije smrtonosnog pohoda govori o "invaziji" latinoameričkih imigranata te navodi kako autor podržava napadača koji je prije nekoliko mjeseci ubio 51 osobu u džamiji na Novom Zelandu.

Dokument je objavio anonimni korisnik koji je objavio još jedan dokument imena "P. – Crusius". Taj je dokument uklonjen te njegov sadržaj nije poznat, prenosi Al Jazeera Balkans.

Račun na Twitteru za koji se čini da je pripadao Crusiusu u subotu naveče je obrisano.

Objavama na računu hvalio je predsjednika Donalda Trumpa, posebno njegovo nastojanje da izgradi zid duž američke granice s Meksikom.

Predsjednik Trump osudio je pokolj u El pasu kao "odvratni čin" i na Twitteru napisao "Ne postoje razlozi niti izgovori koje će ikada opravdati ubijanje nevinih ljudi".

Daniel Heo, dvadesetogodišnjak iz Plana u Teksasu, rekao je za Los Angeles Times da je s Crusiusom pohađao osnovnu školu gdje su zajedno igrali košarku i nogomet. Također su zajedno bili u dječjem vrtiću u osnovnoj školi Beverly u Planu.

Heo je rekao da nakon osnovne škole više nije bio u kontaktu s Crusiusom, a tek ga se u subotu sjetio nakon što je primio poruku prijatelja o pucnjava i Crusiusu kao navodnom napadaču.

"Šokiran sam. Bio je dobro dijete", rekao je Heo.

Objavljujući broj poginulih na konferenciji za novinare, teksaški guverner Greg Abbott rekao je da je ovo "jedan od najsmrtonosnijih dana u historiji Teksasa".

Narednik tamošnje policije Robert Gomez rekao je da je osumnjičen odveden u pritvor bez incidenata.

Televizijska stanica KTSM objavila je na svojim web stranicama dvije fotografije navodeći da je na njima osumnjičenik snimljen sigurnosnim kamerama u trenutku kada je ulazio u Walmart.

Slike pokazuju mladog bijelca s naočalama, u vojničkim kaki hlačama i tamnoj majici kratkih rukava kako pokazuje pušku u napadačkom položaju. Čini se da ima slušalice ili štitnike za uši.

Masovne pucnjave česte su u Sjedinjenim Američkim Državama. Naoružani tinejdžer otvorio je vatru na festivalu hrane u sjevernoj Kaliforniji 29. jula i ubio troje ljudi prije nego što je počinio samoubistvo. (Agencije, F)

Date: 04-08-2019